

ಯುದನು ಬರೆದ ಪತ್ರಿಕೆ ಯುದಾನಿ ಲಿವಲ್ಯಾಲ ಪತ್ರ ವಳಕ್

ಯುದಾನಿ ಲಿವಲ್ಯಾಲ ಪತ್ರ ಯುದ್ ಮಂಥ್ಯಾಲ್ಯಾನಿ ಲಿವಲ್ಯಾಲ್ಯಾ ಯುದ್ ಆಪಲ್ಯಾಲ್ಯಾ ಆಪ್ಪುಸ್ ಯೇಸುಚಾ ಬಾಹು ಜಾಲ್ಯಾಲಾ ಯಾಕೊಬಾಚಾ ಬಾಹು ಮನ್ವುನ್ ಗೆಥೊ. ಮನ್ವುನ್ ತ್ಯೊ ಸಾಹಿತ್ ಯೇಸುಚಾ ಬಾಹು ಮನ್ವುನ್ ಇಸ್ವಾಸ್ ಹಾ.1 ಹ್ಯ ಪತ್ರ ಲ ಕರುನ್ ಯಕ ಸಭೆಲಾ ಲಿವಲ್ಯಾ ಮನ್ವುನ್ ಆಮಾನಾ ಸಮಜುನ್ ಆಲ ನಾಹಿ ಆನಿ ಜುನ್ಯಾ ಕರಾರಾಚಾ ಥೊಡ್ಯಾ ಖನ್ಕತಿ ಹ್ಯಾ ಪತ್ರ್ಯಾತ್ ಉಪೇಗ್ ಕೆಲ್ಯಾಲ ಬಗ್ಗೆ ತವಾ ಹ್ಯಾ ಪತ್ರ್ಯಾಚಾ ಮುಖ್ಯಾ ವಾಚಿವ್ನಾರ ಯೆಹುದಿ ಜಾಲ್ಯಾತ. ತರಿಬಿ ಯುದಾನಿ ಹ್ಯ ಪತ್ರ ಹಾಕಟ್ಲ್ಯಾಲ್ಯಾ ಸಗ್ಳಾನಾ ಬಾ ಜಾಲ್ಯಾಲ್ಯಾ ದೇವಾಚೆ ಮಾಯೆಚಾ ಲೊಕಾನಾ ಆನಿ ಯೇಸು ಕ್ರಿಸ್ತಾಸಾಟಿ ಥೆವ್ಲ್ಯಾಲ್ಯಾನಾ ಮನ್ವುನ್ ಲಿವಲ್ಯಾ 1:1 ಹ್ಯ ಪತ್ರ ಖುಬ್ ಕರುನ್ ಕ್ರಿಸ್ತ್ ಜಲ್ಮುನ್ ಸಾಟ್ವ್ಯಾ ವರ್ಸಾತ್ ಲಿವಲ್ಯಾ.

ಹ್ಯ ಪತ್ರ ಲಿವಾಚೆ ತ್ಯಚಾ ಉದ್ದೇಶ್ ಲಬಾಡ್ ಸಾಂಗ್ತಾಲ್ಯಾಂಚಿಪ್ಪಿ ಚುಕಿಚೆ ವಾಟವ ಜಾವು ನಾಹಿತ ಮನ್ವುನ್ ಸಗ್ಳಾ ಇಸ್ವಾಸಿ ಲೊಕಾನಾ ಹುಶಾರ್ಕಿ ದಿಯಾಚಿ ಜಾಲ್ಲಿ 1:1-4ತ್ಯನಿ ಆಪಲ್ಯಾ ಬೊಲ್ಯಾನಾ ಬಳ್ ದಿಯಾಸಾಟಿ ಜುನ್ಯಾ ಕರಾರಾಚಾ ಘಟ್ನಾ ಉಪೇಗ್ ಕರ್ತೊ. ಹ್ಯ ಪತ್ರ 2 ನವ್ಯಾ ಪತ್ರ್ಯಾತ್ ಆಪಲ್ಯಾಲ್ಯಾ ಲಬಾಡ್ ಸಾಂಗ್ತಾಲ್ಯಾಂಚೆ ಆಡ್ಡ ಹುಶಾರ್ಕಿ ದೇವ್ದುತ್ ಆನಿ ಸೊದೊಮ್ ಗೊಮೊರ್ ಪೆರಚಾ ಗುಶ್ಟಿ ಮಿಳಾಲ್ಯಾಚೆಗತ್ ಖುಬ್ ಗುಶ್ಟಿ ಹ್ಯಾ ಪತ್ರ್ಯಾತ್ ಬಹಾಯಾ ವ್ಹತ 1:4,2 ಪೇತ್ರ 2:1

ಭಾಗ್

1. ಯುದ್ ಆಂದಿ ಆಪಲ್ಯಾ ವಾಚಿವ್ತ್ಯಾಲ್ಯಾನಾ ದಾವುನ್ ಗೆಥೊ 1:1-2

2. ನಂತರ್ ತ್ಯೊ ಲಬಾಡ್ ಸಾಂಗ್‌ತ್ಯಾಲ್ಯಾಂಚೆ ಆಡ್ವಾ ತ್ಯನಾ ಹುಶಾರ್ಕಿ ದೆತ್ಯಾಚೆಗತ್ ಲಿವಾಚ್ ಕಾರನ್ ಸಾಂಗ್ಲೊ1:3-4
3. ನಂತರ್ ಜುನ್ಯಾ ಕರಾರಾತ್‌ಲ್ಯಾ ಲೊಕಾಂಚ್ ಆನಿ ಘಟಾಂಚ್ ಉದಾಹರನ್ ದೆತೊ 1:5-16
4. ನಂತರ್ ತ್ಯೊ ಹೆ ಹುಶಾರ್ಕಿಲಾ ತ್ಯಂಚಾ ಪ್ರತಿ ಉತ್ತರ್ ಕ್ಯಾ ರಾಹ್ಯಾ ವ್ಹಯಿ ಮನ್ವನ್ ಸಾಂಗ್ಲೊ 1:17-23
5. ಸರ್ತ್ಯಾಲಾ ದೇವಾಲಾ ಸ್ತುತಿ ಕರುನ್ ಆಪ್ಲ ಪತ್ರ ಸುಪಿವ್ಲೊ1:24-25

1 ಯೇಸು ಕ್ರಿಸ್ತಾಚಾ ಸೇವಕ್, ಯಾಕೊಬಾಚಾ ಬಾಹು ಜಾಲ್ಯಾಲ್ಯಾ ಯುದಾನಿ ಹಾಕಟ್‌ಲ್ಯಾಲ್ಯಾನಾ, ಬಾ ದೇವಾಚಾ ಮಾಯೆಂಚಾನಾ, ಯೇಸು ಕ್ರಿಸ್ತಾಟಿ ರ್ಯಾಕ್‌ಲ್ಯಾಲ್ಯಾನಾ ಲಿವಾಚ್ ಕ್ಯಾ ಮಂಜೆ,

2 ತುಮಾನಾ ಕರ್ನಾ, ಥಂಡ್‌ಪನ್, ಮಾಯಾ ಖುಬ್ ಗಾಹುನಿ.

ಲಬಾಡ್ ಸಿಕ್ಷನ್ ದೆನಾರ

3 ಮಾಯೆಂಚಾನು, ಆಮಾನಾ ಗಾವಲ್ಯಾಲೆ ರಕ್ಷನಾಚೆ ಗುಶ್ಟಿತ್ ತುಮಾನಾ ಲಿವಾಯಾ ಪುರ್ಯಾ ಮನಾನಿ ತಾಕ್ನಿ ಯೆತ್ನ ಕರ್ತಾನಾ, ದೇವಾಚಾ ಲೊಕಾನಾ ಶಾಶ್ವತ್ ರಾತ್ಯಾಸಾರ ಯಂಗ್ವಾಡ್ ತಾಬ್ಯಾತ್ ದಿಲ್ಯಾಲಾ ಇಸ್ವಾಸ್ ರಾಕಾಯಾ, ತುಮಿ ಲಡಾಯಾ ವ್ಹಯಿಸಾ ಮನ್ವನ್ ಜಾಗ್ರುತ್ ಕರುನ್ ಲಿವಾಚ್ ಮನಾ ಗರಜ್ ಹಾ ಆಸಿ ದಿಸ್ಲಿ.

4 ಕಾ ಮಂಯೆ ಭಕ್ತಿ ನಸ್‌ಲ್ಯಾಲ, ಆಮ್ಚಾ ದೇವಾಚಿ ಕ್ರಪಾ ನೆವಾ ಕರುನ್ ವ್ಯಬಿಚಾರಾಚಿ ಕಾಮ ಕರ್ನಾರ, ಆಮ್ಚಾ ಯಕ್ಲಾಸ್ ದನ್ಯಿ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಚಿ ನಕ್ವಾಟ್ ಕರ್ತಾಲಿ ಥುಡಿ ಲೊಕ ಬುರ್ಸೆ ತರನಿ ಮಂಡಳಿತ್ ಬರ್ಲ್ಯಾತ. ತೆ ಶಿಕ್ಷಾ ಸಾಟಿ ಆಂದಿಸ್ ಥರಿವ್‌ಲ್ಯಾತ ಮನ್ವನ್ ಪವಿತ್ರ ಗ್ರಂಥಾತ್ ಲಿವ್‌ಲ್ಯಾ.

5 ತುಮಿ ಸಗ್ಳೆ ಆಂದಿಸ್ ಸಮಜುನ್ ಗೆತ್ಲಸಾ ತರಿ, ಮಿ ಮಾಗ್‌ಲ್ಯಾ ಘೊಡ್ಯಾ ಖನ್ವತಿ ತುಮಾನಾ ಯಾದ್ ಕರಾಯಾವ್ಹಯಿ ಮನ್ವನ್ ಮನ್ ಕರ್ತೊ, ಪ್ರಭುನಿ ಆಪ್‌ಲ್ಯಾ ಲೊಕಾನಾ ಐಗುಪ್ತದೇಶೆತ್ಲಿ ರ್ಯಾಕ್ಲಿತ್, ನಂತರ್ ಇಸ್ವಾಸ್ ನಸ್‌ಲ್ಯಾಲ್ಯಾನಾ ನಾಸ್ ಕೆಲಿತ್.

6 ಆಪ್ಲಾ ಹುಕ್ಕಾಚಾ ಜಾಗಾ ರಾಕಾಚೆ ಆಂದಿ, ಆಪ್ಲಾ ಸ್ವಂತಾಚಾ ಜಾಗಾ ಶೊಡ್‌ಲ್ಯಾಲ್ಯಾ ದೇವ್ ದುತಾನಾ ದೇವಾನಿ ಖಾಯಿಮ್ಚಾ ಸರ್ಪೊಳ್ಳಾ ಬಾಂದುನ್, ಮೊಟ್ಯಾ ದಿಸಾತ್ ವ್ಹತ್ಯಾಲ್ಯಾ ತೀರ್ಮಾನಾ ಸಾಟಿ ತ್ಯನಾ ಆಂದಾರಾತ್ ಥೆವ್‌ಲ್ಯಾತ.

7 ತೇಸ್ ತರನಿ ಸೊದೊಮ್ ಗೊಮೊರ್ ಪೆಟ್ಟಿತ್ಲಿ ತ್ಯಂಚೆ ಸರಬವ್ಡಾರೆ ಪೆಟ್ಟಿತ್ಲಿ ತ್ಯಾ ದುತಾಚೆಗತ್ ಘಾಲುನ್ ಆಪ್‌ಲ್ಯಾನಾ ನೀಯತ್ ನಸ್‌ಲ್ಯಾಲ ಶಾರೀಕ್ ಸಂಬದ್ ತಾಬ್ಯಾತ್ ದಿವುನ್, ಆನಿ ಬುರ್ಸ ಜಾಲ್ಯಾಲ ಪೊದ್ಲಿ ಕಾಮ ಕರಾಯಾಲಾಗ್ಲ ಮನ್ವುನ್ ತೇ ಶಾಶ್ವತ್ ಇಸ್‌ಥಾತ್ ಶಿಕ್ಷಾ ಗಿಹಿತ್, ವಾಯಿಟ್ ವಾಟವಲ್ಯಾನಾ ಹೆ ಯೆಕ್ ಉದಾರನ್ ಜಾಲ್ಯಾತ.

8 ಆಸ ಆಸ್ಲತರಿ ಹಿ ಲೊಕ ತೇಸ್ ತರನಿ ಸಪ್ತಾತ್ ಆಸಲ್ಯಾಚೆಗತ್ ಆಪ್ಲ ಶರೀರ್ ಬುರ್ಸ ಕರ್ತ್ಯಾತ. ಹುಕ್ಕಾಚಿ ನಕ್ವಾಟ್ ಕರ್‌ತ್ಯಾತ. ಮೊಟಿ ಪದ್ವಿಚಾನಾ ಅವ್ತಾನ್ ಕರ್ತ್ಯಾತ.

9 ಫನ್ ಖುಬ್ ಮಹತ್ವಾಚಾ ಫುಡಾರಿ ದೇವ್ ದುತ್ ಜಾಲ್ಯಾಲಾ ಮಿಕಾಯೇಲಾನಿ ಮೊಶೆಚಾ ಶರೀರಾಚೆ ಗುಶ್ಟಿತ್ ಸೈತಾನಾ ಸಂಗ ವಾದ್ ಕೆಲಾ ತವಾ, ತ್ಯೊಸೈತಾನಾಚೆ ಆಡ್ವಾಯೊಕ್ ನಿಂದಚಾ ಸಬ್ದ ಬೊಲಾಯಾ ಥೀರ್ ಕೆಲಾ ನಾಹಿ. “ತ್ಯಲಾ ಪ್ರಭು ತುಲಾ ಬ್ಯಾ ದಪಕ್ಯಾವುನಿ” ಮನ್ಲಾ.

10 ಫನ್ ಹಿ ಲೊಕ ಆಪ್‌ಲ್ಯಾಲಾ ರಾವ್ಯಾ ನಸ್‌ಲ್ಯಾಲೆ ಗುಸ್ಪಿಂಚಾ ರಾಗ್ ಕರ್ತ್ಯಾತ ಆನಿ ಆಪ್ಲು ಜನಾವಾರಾಚೆಗತ್ ಸಾದಾರನ್ ಕ್ಯಾಚೆ ಕ್ಯಾ ಸಮಜುನ್ ತ್ಯಾತ್ ಆಪ್‌ಲ್ಯಾಲಾಸ್ ನಾಸ್ ಕರುನ್ ಗೆಥ್ಯಾತ.

11 ತ್ಯಂಚಿ ಹಾಕಿಗತ್ ಕ್ಯಾ ಮನ್ವುನ್ ಸಾಂಗು! ಕಾ ಮಂಜೆ ಹ್ಯಚಾಂನಿ ಕಾಯಿನಾಚಿ ವಾಟ್ ದರ್ಲ್ಯಾಲಿ, ಪೈಸ ಗೊಳಾ ಕರಾಯಾ ಸಾಟಿ ಬಿಳಾಮಾಚೆತ್ ಪುರಿ ಪಡ್‌ಲ್ಯಾತ, ಕೊರಹನಾಚೆಗತ್ ಮೊರ್ದುಬುಲುನ್ ನಾಸ್ ವ್ಹನಾರಿ ಜಾಲ್ಯಾತ.

12 ತೀ ಸಂಮಿದೊರಾತ್‌ಲ್ಯಾ ಆಡ್‌ಶಾ ಆಸ್‌ಲ್ಯಾಲ್ಯಾ ಅಪಾಯಾ ಶಾರ್ಕ, ತುಮ್ಮಾ ಸುಪ್ತಿ ಪನಾಚ್ ಜೆವಾನ್ ಖಾತ್ಯಾತ ಪಿತ್ಯಾತ. ದಿರಾನಿ ಸ್ವತಾಚ್ ಪ್ವಾಟ್ ಬರ್ನಾರ್ ಜಾಲ್ಯಾತ. ತೀ ವಾರ್‌ಯಾನಿ ಉಡುನ್ ಜಾತ್ಯಾಲ ಪಾನಿ ನಸಲ್ಯಾಲ ಡಗ್ ಜಾಲ್ಯಾತ, ಪೀಕ್ ಯಯಿನಸ್ಸಾರ್, ಪುರ ಮೆಲ್ಯಾಲ

ಮುಳ್ಳಾ ಸಕಟ್ ಉಪಾಟಲ್ಯಾಲ ವಾಂಞೊಳ ಝಾಡ ಜಾಲ್ಯಾತ.

13 ಸ್ವತಾಚಾ ಅವ್ಮಾನ್ ಮಂತ್ಯಾಲಾ ಫೈಸ್ ವಕ್ಸಾರ್ಲ್ಯಾ ಸಮಿಂದೊರಾಚಾ ಮೊಟ್ಯಾ ಲಾಟಾ ಜಾಲ್ಯಾತ. ಫಿರ್ತ್ಯಾಲ್ಯಾ ಚಾನ್ಯಾ ಜಾಲ್ಯಾತ ಹ್ಯಂಚಿ ಸಾಟಿ ಖಾಯಿಮ್‌ಚಾ ಆಂದಾರ್ ರಾಮಿನ್ ಥೆವ್‌ಲ್ಯಾ.

14 ಆಸ್‌ಲ್ಯಾಂಚೆ ಗುಶ್ಟಿತ್ ಆದಾಮಾ ದರ್ನಿ ಸಾತ್ ಪಿಡಿಚಾ ಹನೊಕ್ ಸಾಹಿತ್, “ಬಗಾ, ಪ್ರಭು ಹಾಜಾರಾನಿ ಪರಿಶುದ್ಧಾನಾ ಗಿಹುನ್ ಯತ್ಯೊ.

15 ಸಗ್‌ಳ್ಯಾಂಚಾ ನ್ಯಾಯಿ ನಿವ್ಡಾಯಾ, ತ್ಯಂಚಾತ್ ಭಕ್ತಿ ನಸ್‌ಲ್ಯಾಲ್ಯಾ ಸಗ್‌ಳ್ಯಾಂಚಾಂನಿ ಕೆಲ್ಯಾಲಿ ಭಕ್ತಿ ನಸ್‌ಲ್ಯಾಲಿ ತ್ಯಂಚಾ ಸಗ್‌ಳ್ಯಾ ಕಾಮಾಂಚೆ ಗುಶ್ಟಿತ್ ಆನಿ ಭಕ್ತಿ ನಸ್‌ಲ್ಯಾಲ ಪಾಪಿಂಚಾಂನಿ ಆಪ್ಲೆ ಆಡವ್ಯಾಸಾಂಗಲ್ಯಾಲ್ಯಾ ಸಗ್‌ಳ್ಯಾ ಬಿರುಸ್ ಬೊಲ್ಯಾಂಚೆ ಗುಶ್ಟಿತ್ ತ್ಯನಾ ಚುಕ್ ದಾವಾಯಾ ಆಲ್ಯಾ.”

16 ಹಿ ಟುರ್ ಟುರ್‌ತ್ಯಾಲಿ, ಚಾಡಿ ಸಾಂಗ್ನಾರಿ, ಆಪ್ಲಿ ವಾಯಿಟ್ ಇಚೆಸಾರಿ ಚಾಲ್ನಾರಿ, ಬಡಾಯಿ ಸಾಂಗ್ನಾರಿ ಆಪ್ಲೆಸಾಟಿ ವವ್ಯಾಳ್ಚಿಚಾ ಬೊಲ್ಯಾ ಬೊಲ್ನಾರ್ ಜಾಲ್ಯಾತ.

ಹುಶಾರ್ಕಿ ಆನಿ ಬಡಾಯಿ

17 ಮಾಯೆಚಾನು, ತುಮಿ ತರಿ ಆಮಚಾ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಚಾ ಅಪೊಸ್ತಲಾಂಚಾಂನಿ ಆಂದಿ ಸಾಂಗ್‌ಲ್ಯಾಲ್ಯಾ ಬೊಲ್ಯಾಂಚಿ ಯಾದ್ಕರಾ.

18 “ಬಕ್ತಿಚೆ ಆಡವ್ಯಾ ಆಸಲ್ಯಾಲ್ಯಾ ಆಪ್ಲೆ ಆಶೆಂಚೆಗತ್ ಭಾಲತ್ಯಾಲ ಖೆಡ್ನ ಸರತ್ಯಾ ಯೆಳಾತ್ ಯನಾರ್ ಮನ್ವುನ್ ತ್ಯಂಚಾಂನಿ ತುಮಾನಾ ಸಾಂಗ್ಲೆ.

19 ಹಿ ಆಪಲ್ಯಾಲಾ ಆಪ್ಲುನ್ ಯಗ್‌ಳಾರ್ ಆಪ್‌ಲ್ಯಾ ಶರೀರಾಚೆ ಆಶೆಂಚೆಗತ್ ಭಾಲತ್ಯಾಲಿ ವ್ಹನಾರ್ ತ್ಯಂಚಿಪ ಪವಿತ್ರ ಆತ್ಮನಾಹಿ.

20 ಮಾಯೆಚಾನು, ತುಮಿತರಿ ತುಮಾನಾ ಆಸ್‌ಲ್ಯಾಲ್ಯಾ ಖುಬ್ ಪರಿಶುದ್ಧ ಕ್ರಿಸ್ತಾಚಾ ಇಸ್ವಾಸಾಚಾ ಆಧಾರಾನಿ ಅಬಿವ್ರದಿ ವ್ಹವಾ, ಪವಿತ್ರಾತ್ಮಾನಿ ಬಿರುನ್ ಮಾಗ್ತಕರಾ.

21 ಶಾಶ್ವತ್ ಜೀವಾಸಾಟಿ ಆಮ್ನಾ ಪ್ರಭು ಯೇಸು ಕ್ರಿಸ್ತಾಚಿ ಕರ್ನಾ ಮೊರ್ಲ್ಯಾಚಿತ್, ತುಮಾನಾ ದೇವಾಚೆ ಮಾಯಾತ್ ರಾಕಾ.

22 ಆನ್ಮಾನ್ ಖಾನಾರ್ಯಾಚ್ಚಿ ತುಮಿ ಕರ್ನಾದಾವಾ,

23 ಇಸ್ತ್ಯಾಚಾ ತೊಂಡಾತ್ ಆಸಲ್ಯಾಲ್ಯಾನಾ ವಡುನ್ ರಕ್ತನ್ ಕರಾ, ಥೊಡ್ಯಾನಾ ಬೀಹಿತ್ ಕರ್ನಾ ದಾವಾ. ಶಾರೀರಿಕ್ ಚಾಲ್ತುಕಿತ್ಲಿ ಫ್ಯಾನ್ ಜಾಲ್ಯಾಲ್ಯಾ ತ್ಯಂಚಾ ಕಪಡ್ಯಾಂಚಾ ರಾಗ್ ಕರಾ.

ಸ್ತುತಿಚ್ ಮಾಗ್ನ್

24 ಪಡಾಚೆ ಆಂದಿ ತುಮಾನಾ ರಾಕಿತ್, ಆಪ್ಲೆ ಮೈಮೆಚೆ ಮೊರ್ಲ್ಯಾ ತುಮಾನಾ ನಿರ್ದೋಷಿ ಕರುನ್, ಖುಬ್ ಸಂತೊಶಾನಿ ಉಬರಾಹ್ಯಾ ತ್ಯೊ ಬಳಿ ಜಾಲ್ಯಾ

25 ತ್ಯಲಾ ಆಮಚಾ ರಕ್ತಕ್ ಜಾಲ್ಯಾಲ್ಯಾ ಯಕ್ಲ್ಯಾಸ್ ದೇವಾಲಾ, ಆಮಚಾ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಸ್ ಲಾಗುನ್ ಮೈಮಾ, ವೈಭವ್, ರಾಜ್ಕಾರ್, ಆನಿ ಅಧಿಕಾರ್ ಸರ್ವ್ವಾ ಕಾಲಾತ್ ಆಂದಿ ಆತಾ ಆನಿ ಕವಾಬಿ ತ್ಯಲಾಸ್ ವ್ಹವುನಿ. ತಸಸ್ ವ್ಹವುನಿ.

ದೆವಾಚಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಚಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಚಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922